

Date – 21/10/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Mizoram chak lakna kawngpui Aizawl Silchar inkar siamthat phutin Mizoram Tipper Association in Ningani atang khian kawngpui dan leh an tum.
2. Dampa assembly bial hun laklawha inthlanna chu kil 5 atangin chuh a ni dawn.
3. Prime Minister Narendra Modia chuan kum 10 kalta chhungin India in ralthuam a siam chhuah chu a let thumin a pung tih a sawi.
4. Bihar Assembly inthlan thawhkhatna seat 121 a neih turah candidate 1314 an awm dawn.

<><><>

TRUCKERS

Mizoram Tipper Association, District Headquarter's, Kolasib leh Joints Action Committee te chuan tunkar Ningani zing dar 7 atanga Pathianni tlai dar 4 thleng Vairengte - Sairang leh Bairabi - Kolasib inkar kawng an dang dawn.

National Highway 306 leh 06 kawngpui enkawltu NHIDCL leh Mizoram sorkar chu tun aia chak zawka kawng chhe lai thawm tha turin pawl pahnihte hian an phût bawk. Pawl pahnihte hian thuchhuah an siam a, Mizoam châk lakna kawngpui Vairengte - Sairang leh Bairabi - Kolasib inkar kawng khuar laite hnawh hna leh thawmthat hna thawh mek ni mah se, an hnathawh a chak tawk lo hle a, tun anga an thawh reng chuan Mizoram kawngpui pawimawh hi kumin mai pawh ni lo, nakum fur hma pawhin an siam zawh a rinawm loh thu leh nakumah phei chuan tun aia a chhiat nasat zawk an rin thu an tarlang a ni.

NHIDCL leh Mizoram sawrkar chu tun aia chak zawka kawng siam hna thawk tur te, sub-grade atanga siam tur leh thawk ngei turinte MTA Kolasib leh JAC chuan an phut a. Hna chak taka an thawh theih na'n leh kawngpui pawimawh tak mai an ngaihthah em avangin lirtheia eizawng ten lungawi lohna lantir na'n October ni 23 zing dar 7 atanga October 26 tlai dar 5 thleng Vairengte leh Sairang inkar kawngpui leh Bairabi leh Kolasib inkar kawng hi an dan dawn thu tarlangin, Kawnpui leh Durtlang inkar kawngah lirthei eng chi mah tlan lo turin an ngen a ni.

MTA Kolasib leh JAC chuan kawngpui tha an duh avanga an nawrhna chu Mizoram mipui tana tha zawk tur a nih thu an tarlang a; an hmalakna thlawp tlat turin mipui an ngen.

Kawng dan chhung hian ambulance, magistrate, emergency duty-te Ieh tul bik thila mahni awmna veng VC/ YMA hriatpuina lehkha neite chu hriathiam an nih dawn thu an tarlang bawk.

DRUGS, LIQUOR

Champhaia Excise & Narcotics Department mi leh sate chuan kum khat leh thla 9 chhungin zu leh ruihhlo kaihhnawihah thubuai 636 an ziaklut a, mi 556 an man tawh.

Champhai district Excise & Narcotics Department mi leh sate'n kum 2024 kum tluana ruihhlo kaihhnawih thubuai an ziahluh leh mihring an man zat aiin kumin thla 9 chhunga thubuai an ziahluh leh mi an man zat hi a tam tawh zawk a. Excise & Narcotics Minister Pu Lalnghinglova Hmar-in kar kalta Inrinni a Champhai Circuit House-a chanchinbumite a kawmnna-ah, kum 2024 kum tluan leh kumin January atanga September thla thleng khan Champhai Excise duty-te chuan zu leh ruihhlo kaihhnawihah thubuai 636 an ziahluh thu leh mihring 556 an man thu a tarlang a. Kum 2024 chhung khan Champhai Excise-te hian ruihhlo kaihhnawihah mi 95 an man laiin kuminah thla 9 chhungin mi 112 an man tawh a, Narcotic Drugs & Psychotropic Substances Act, 1985 hmanga nikuma thubuai 71 an ziahluh laiin kuminah thubuai 87 an ziaklut tawh a ni.

Nikum chhung khan Champhai Excise & Narcotics Department hnathawkte hian zu kaihhnawihah thubuai 304 an zia lut a; kuminah 174 ziahluh tawh niin, nikum khan mi 220 an man a, kuminah mi 129 an man tawh bawk.

Champhai Excise & narcotics duty-te hian nikum khan heroin kg 8 leh gram 783 leh meth kg 86 leh gram 835 an man a, kuminah hian January leh September thla inkar chhung khan heroin kg 12 leh gram 616 leh meth kg 87 leh gram 639 man tawhin, nikuma an man zat aiin kumin thla 9 chhunga heroin leh methamphetamine an man zat hi a tam tawh zawk bawk a ni.

Kumin hian Champhai Excise duty-te hian sap zu (IMFL) um puitling 1,012 an man tawh a, nikum khan um 733 manin, kumin thla 9 chhunga sap zu an man zat hi nikuma an man zat aiin um 279-in a tam tawh zawk a ni.

BIOMETRIC ENROLMENT

Myanmar atanga raltlan awm mekte kutze thla leh mit-naute lakkhawm mekah raltlan awmzat atanga chhuta za zela 43 point 53 lak zawh tawh a ni.

Home department atanga Akashvani Aizawl-in thu a dawn danin Zirtawpni thleng khan Myanmar raltlan 31,265 zinga 13,610-te biometric data lakkhawm a ni tawh a. July thla tawp atang khan he hna hi district 11-ah kalpui tan a ni a, khawl harsatna leh internet chak tawk loh avangin duh angin an thawk chak thei lova, chuti chung chuan tha thlah lova kalpui zel a ni. Biometric enrolment buaipuitute chuan a huhova relief camp-a awmte mitnaute leh kutze thla lak chu a harsat vak loh lai-in chhungkhat laina leh thiante belte bakah mi in luahte, mi huana awm chilha inhlawhte an awmna hmuna tlawh chhuah chuan hun a duh hle niin an sawi a ni

Kum 2021 February ni 1-a Myanmar sipai Commander-in-Chief Gen. Min Aung Hlaing-a kaihhruaite'n mipui thlan sorkar thuneihna pawng chhuha sipai sorkarna an din hnu hemi kum vek March thla bul atang khan Myanmar atang hian raltlan an lo lut tan a. An tam lai berin mi sing nga an chuang ni a hriat a ni. Tun hnu, Mizoram dep Chin state a Myanmar sipai inkulhna hmunte Chin National Army (CNA) leh sipai sorkar paihthla tura ralthuam keng pawl hrang hrangte'n an

lak fai deuh thaw hnu-ah an awmna a ralmuang tawha hria-in raltlan tam tak chu an let leh tawh a. Sipai dotu pawlte inkara ralthuam lek a awm leh thin avangin an rawn luh belh leh thin bawk a ni.

<><><>

DAMPA BYE-POLL

Dampa assembly bial hun laklawha inthlanna atan PC party chuan an candidate tur chu an party vice president Pu K. Zahmingthanga, Aizawl Sakawrtuichhun veng a nih thu an puang.

People's Conference (PC) party president Pu Vanlalruata'n Akashvani Aizawl a hrilh danin Dampa assembly bial bye-election hi an party chuan chuh an tum a. An candidate tur hi puangin vawiin hian he inthlanna a returning officer hnenah Pu K. Zahmingthanga hian a nomination a thehlut dawn a ni.

PC Party-in an chuh ve dawn takah chuan Dampa bial bye-election chuhtu hi mi 5 an awm dawn ta a. Bhartiya Janata Party (BJP), Congress, MNF leh rorellai ZPM-te chuan an candidate tur an puan tawh bakah an candidate-te hian chuh turin an hming an pelut vek tawh a. He tih lai hian independent a ding tur an awm awm thawm hriat a ni lo.

BJP chuan kum 2023 a he lai biala Congress candidate, tunhnai a an party zawmtu Pu Lalhmingthanga chu an vawrh a, Congress chuan Minister hlui Pu John Rotluangliana an candidate a. MNF chuan an party senior vice president leh Minister hlui Dr. R. Lalthangliana dintirin ZPM atangin kum 2023 inthlana tling zo tawh lo Pu Vanlalsailova an din nawn tir leh bawk a. Candidate leh party hrang hrangte hian vote zawn beihpui an thlak mek a ni.

Dampa assembly bial bye-election a tul chhan chu July ni 21-a helai bialtu MLA Pu Lalrintluanga Sailo MNF a thih vang a ni a. Bye-election atan hian November ni 11 khian vote thlak a ni ang a, November ni 14-ah vote chhiar a ni dawn a ni.

<><><>

MUHCS

Mizoram Universal Health Care Scheme (MUHCS) atan July leh September thla inkar chhung khan finance department-in cheng vaibelchhe 35 a pe chhuak.

MUHCS kalpuitu damdawi-in te'n he ruahmanna hnuaia inziaklut damlo an enkawlna senso phuhruk na'n July - September thla inkar chhung khan Finance department chuan Mizoram State Healthcare Society (MSHCS) hnenah cheng vaibelchhe 35 a pechhuak a. Pawisa hi Mizoram chhunga MUHCS kalpuitu damdawi-inte hnenah an pe tawh. MSHCS hotute chuan Akashvani Aizawl zawhna chhangin, July - September quarter atan khan Finance department-ah MUHCS kalpuitu damdawiinten damlo an enkawlna senso tura ruahman (proposal) cheng vaibelchhe 35 an thehluh thu an sawi a. Finance department hian cheng vaibelchhe 35 hi corpus fund atangin MSHCS hnenah July ni 15 khan cheng vaibelchhe 10 an pe a, August ni 4-ah vaibelchhe 15 leh September ni 23-ah vaibelchhe 10 an pe leh tih an sawi.

Cheng vaibelchhe 35 hi sorkar damdawiin 77 leh MUHCS kalpuitu empanelled mimal enkawl damdawi-in 20 bakah, emergency-a non-empanelled

hospital-a in admit mi 699-te enkawlina senso atan an pek thu MSHCS hotute chuan an sawi a ni.

MSHCS hotute chuan October - December quarter atan Finance department-ah proposal cheng vaibelchhe 60 an thehluk thu leh Finance department atang hian tun quarter atan pawisa dawn la nei lo mah se, buaipui mek a nih thu erawh an dawng tih an sawi a. Empanelled hospital-te hi khum an neih zat atangin pawisa an mamawh tur hi chhût a nih thu leh empanelled an awm belh chuan pawisa hi an la mamawh belh dawn thu an sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan kum 10 kalta chhungin India in ralthuam a siam chhuah chu a let thumin a pung tih a sawi. Nimina INS Vikrant-a Indian Navy te nen Diwali an hmannaah he thu hi sawiin Pu Modia chuan ralthuam siam chhauh tawh zawng zawng hlut zawng hi cheng vaibelchhe nuai 1 leh sing 5 chuang a ni a ti a. Indo lawng leh tuihnuailawng pawh ramchhungah 40 chuang siam a ni tawh a ti bawk.

Pu Modia chuan Operation Sindoor ah khan ramchhunga sipai chi thumte thawhhona felfai tak avangin hun reiloteah Pakistan a tlawm a ni a ti a. Pu Modia chuan India siam chhuah indo lawnglian hmasa ber INS Vikrant chuan India sipaite thiehna a pholang a ni a ti bawk.

<><><>

BIHAR ELECTION

Bihar Assembly inthlan thawhkhatna seat 121 a neih turah candidate 1314 an awm dawn.Nimin kha inthlan thawh khatna nomination thehlut te tana inhnuhdawh theih hun tawp ni a ni a. A tirah candidate 1690 in nomination file in heng zingah hian 61 an inhnukdawk a. Nomination thehluk atangin 1375 pawm a ni a. Thaleh November ni 6 ah vote thlak a ni ang.

Hetihlai hian Bihar Assembly inthlan thawh hnihna atana nomination pekluh hun chu nimin khan a tawp. Assembly bial 243 zinga 122 ah inthlan thawhnhnihna hi neih a ni dawn a. Thlan thar November ni 11 ah district 20 ah vote thlak a ni ang. Hriat theih chinah inthlan thawh hnhnaah hian nomination paper 1066 a lut tawh a ni.

<><><>